

31. maí 1988

741

Nr. 332

REGLUGERÐ

um takmörkun leigubifreiða á Akureyri og um ráðstöfun
atvinnuleyfa.

1. gr.

Fjöldi allt að 8 farþega leigubifreiða til mannflutninga á Akureyri skal á hverjum tíma miðaður við íbúatölu Akureyrar, þannig að ein leigubifreið komi á hverja 500 íbúa. Reikna skal með tölu þeirra íbúa sem lögheimili eiga á Akureyri samkvæmt nýjustu skýrslum Hagstofu Íslands.

Nú losna leyfi bifreiðastjóra sem hafa leigubifreiðaakstur að aðalatvinnu og skal þá á meðan leigubifreiðar eru fleiri en sem svarar einni á hverja 500 íbúa aðeins endurveita fimmta hvert leyfi.

Við sömu aðstæður skal ekki veita ný leyfi vegna fjölgunar íbúa.

Þegar rétt hlutföll samkvæmt framansögðu eru fengin milli tölu leigubifreiða og íbúatölu, skal veita atvinnuleyfi í stað hvers leyfis er losnar, svo og vegna fólksfjölgunar, eitt atvinnuleyfi fyrir hverja 500 íbúa.

Atvinnuleyfi skulu að jafnaði veitt frá og með 1. júní ár hvert ef veita skal þau samkvæmt framansögðu.

2. gr.

Enginn leigubifreiðastjóri má hafa afgreiðslu hjá bifreiðastöð á Akureyri nema hann hafi öðlast atvinnuleyfi sem leigubifreiðastjóri á Akureyri. Leyfin skulu tölusett og bundin við nafn leyfishafa. Engum má úthluta fleiru en einu atvinnuleyfi.

Skylt er leyfishafa að hafa ljósaskilti á þaki bifreiðar sinnar sem skal loga þegar ökumaður óskar viðskipta. Skiltið skal lýsa með gulu ljósi án þess að blinda og skal standa „TAXI“ á því með minnst 50 mm stöfum. Lýsti flöturinn skal vera minnst 185 cm².

Öðrum en leyfishöfum er óheimilt að nota slík skilti.

3. gr.

Óheimilt er að veita bifreiðastjóra atvinnuleyfi nema hann skuldbindi sig til að stunda akstur leigubifreiðar sinnar sem aðalatvinnu og sækji um upptöku í Bílstjórafélag Akureyrar.

4. gr.

Leigubifreiðastjórar sem ekki hafa afgreiðslu hjá bifreiðastöð á Akureyri hafa ekki atvinnurétt þar nema eftir kvaðningu fyrirfram.

5. gr.

Bifreiðastjóri sem óskar að fá atvinnuleyfi sem leigubifreiðastjóri skal sækja um á þar til gerðum eyðublöðum til Bílstjórafélags Akureyrar. Umsókninni skal fylgja vottorð frá bifreiðastöð á Akureyri um að umsækjandi geti fengið þar afgreiðslu.

Atvinnuleyfin skulu gefin út af tveimur mönnum sem eru nefndir úthlutunarmenn í reglugerð þessari. Skal annar þeirra tilnefndur af stjórn Bílstjórafélags Akureyrar en hinn af ráðherra. Tilnefningin er til þriggja ára í senn.

Úthlutunarmenn skulu líta eftir, að ákvæðum laga um leigubifreiðar og reglugerðar þessarar sé fylgt.

Stjórn Bílstjórafélags Akureyrar skal senda úthlutunarmönnum til afgreiðslu umsóknir um atvinnuleyfi og annað sem fyrir þá ber að leggja samkvæmt reglugerð þessari ásamt rökstuddum tillögum.

Við úthlutun atvinnuleyfa skal starfsaldur bifreiðastjóra við allt að 8 farþega leigubifreiðar lagður til grundvallar þannig að sá sem lengstan hefur starfsaldur gengur fyrir nema sérstakar ástæður mæli gegn því.

6. gr.

Leyfishafa er heimilt að hafa bifreið sína í afgreiðslu hjá hverri þeirri bifreiðastöð á Akureyri sem hann getur fengið afgreiðslu hjá enda sé bifreiðastöðin viðurkennd af bæjarstjórn Akureyrar.

Óheimilt er bifreiðastöð að taka bifreið í afgreiðslu fyrr en viðkomandi bifreiðastjóri hefur lagt fram atvinnuleyfi sitt. Leyfið skal vera í vörslu bifreiðastöðvarinnar á meðan leyfishafi hefur þar afgreiðslu.

Nú vill leyfishafi flytja sig á aðra bifreiðastöð og skal hann þá afhenda þeirri bifreiðastöð er hann ekur hjá yfirlýsingu frá þeirri stöð sem hann hyggst flytja á um að hann geti fengið þar afgreiðslu.

Síðan skal sú bifreiðastöð sem leyfishafi flytur frá tilkynna Bílstjórafélagi Akureyrar flutninginn innan 4 daga.

Bifreiðastöð er óheimilt að halda atvinnuleyfi leyfishafa ef hann flytur sig löglega til afgreiðslu á annarri bifreiðastöð.

7. gr.

Leyfishafa er óheimilt að láta atvinnuleyfi sitt af hendi á nokkurn hátt nema til Bílstjórafélags Akureyrar sem tilkynnir það þegar úthlutunarmönnum.

Leyfishafi sem af einhverjum ástæðum getur ekki ekið leigubifreið samkvæmt leyfi sínu eða notað það á annan hátt löglega getur haldið leyfisréttindum sínum í allt að 6 mánuði.

Ef sérstaklega stendur á geta úthlutunarmenn framlengt þennan frest enda óski leyfishafi þess.

Leyfishafi getur misst atvinnuréttindi sín, ef hann er fjarverandi tvo mánuði eða lengur án þess að hafa tilkynnt viðkomandi bifreiðastöð fjarveru sína og orsakir hennar. Stöðvarstjóri skal þá tilkynna fjarveruna stjórn Bílstjórafélags Akureyrar en hún ber málið undir úthlutunarmenn sem ákveða hvort svipta skuli leyfishafa atvinnuleyfi eða ekki.

8. gr.

Ef leyfishafa er sagt upp afgreiðslu af gildum ástæðum skal viðkomandi bifreiðastöð afhenda atvinnuleyfi hans formanni Bílstjórafélags Akureyrar samdægurs eða næsta virkan dag. Skal leyfið vera í vörslu félagsins meðan leyfishafi er að útvega sér afgreiðslu hjá annarri bifreiðastöð.

Takist leyfishafa ekki að fá afgreiðslu hjá annarri bifreiðastöð innan 30 daga hefur hann fyrirgert rétti sínum til leyfisins og fellur það þá til úthlutunar að nýju nema úthlutunarmenn ákveði annað.

9. gr.

Nú hættir leyfishafi að reka leigubifreið samkvæmt atvinnuleyfi sínu og segir leyfinu upp fyrir fullt og allt. Skal hann þá skrá yfirlýsingu þar að lútandi á atvinnuleyfi sitt og bifreiðastöð sú sem hann hafði afgreiðslu hjá síðan afhenda atvinnuleyfið formanni Bilstjórafélags Akureyrar samdægurs eða næsta virkan dag. Síðan ráðstafa úthlutunarmenn leyfinu samkvæmt reglugerð þessari.

Á sama hátt skal skila til Bilstjórafélags Akureyrar atvinnuleyfum sem losna af öðrum orsökum en um getur í 1. mgr. svo sem við andlát leyfishafa eða ef hann fyrirgerir rétti sínum til leyfisins.

10. gr.

Bifreiðastjórar sem hafa haft atvinnuleyfi í 3 ár eða lengur og segja upp leyfi sínu hafa forgangsrétt til þess á næstu tveimur árum enda hafi leyfið legið inni minnst 4 mánuði og þeir skuldlausir við viðkomandi bifreiðastöð og Bilstjórafélag Akureyrar. Forgangsréttinn geta leyfishafar nýtt sér tvisvar sinnum á þennan hátt. Þeir leyfishafar sem ekki segja upp leyfinu sjálfir hafa ekki forgangsrétt.

11. gr.

Leyfishafa sem missir tilskilin réttindi til aksturs allt að 8 farþega leigubifreiðar til mannflutninga gegn gjaldtöku er heimilt að láta annan mann annast störf sín meðan réttindamissir varir en þó ekki lengur en eitt ár í hverju tilviki. Noti hann sér ekki þessa heimild leggst leyfi hans inn meðan á réttindamissinum stendur og fær leyfishafi atvinnuleyfi aftur jafnskjótt og hann öðlast ökuréttindi sín að nýju.

12. gr.

Óheimilt er að hafa vaktaskipti leigubifreiðastjóra á leigubifreið nema báðir hafi atvinnuleyfi.

13. gr.

Leyfishafa er óheimilt að láta annan mann en þann sem hefur atvinnuleyfi aka fyrir sig nema í eftirgreindum tilfellum að fenginni undanþágu samkv. 14. gr.

- a. Ef leyfishafi er veikur.
- b. Ef leyfishafi er að vinna í þágu Bilstjórafélags Akureyrar, bifreiðastöðva þeirra er reglugerð þessi nær til eða þeirra stofnana verkalýðssamtakanna sem Bilstjórafélag Akureyrar á aðild að.
- c. Ef leyfishafi deyr getur maki hans haldið atvinnuleyfinu í 3 ár frá andláti hans. Úthlutunarmenn leigubifreiða geta framlengt slíkt leyfi í allt að 2 ár til viðbótar, ef sérstaklega stendur á. Tilkynna skal niðurfellingu slíks leyfis með 6 mánaða fyrirvara.
- d. Ef leyfishafar geta ekki sinnt eftirspurn á mesta annatíma má heimila þeim að hafa ökumenn sem einum er heimilt að aka bifreið leyfishafa, telji stjórn Bilstjórafélags Akureyrar nauðsyn til þess og setur hún nánari reglur um undanþágu. Ef þessi heimild nægir ekki og sérstaklega stendur á er heimilt að leyfa vaktaskipti telji stjórn Bilstjórafélags Akureyrar það nauðsynlegt.
- e. Vegna orlofstöku. Skipta má orlofi í fernt. Undanþágu þessa skal einungis veita ef leyfishafi er að fara í orlof og er honum óheimilt að ráða sig í önnur störf eða aka í atvinnuskyni meðan undanþágan varir.

14. gr.

Vilji leyfishafi öðlast undanþágu samkvæmt 13. gr. skal hann sækja um það skriflega til Bílstjórafélags Akureyrar.

Umsókninni skal fylgja vottorð frá bifreiðastöð leyfishafa um að hún samþykki þann ökumann sem leyfishafi vill að aki bifreiðinni.

Bílstjórafélaginu er þá heimilt að veita undanþágu og skal hún vera skrifleg, tímabundin og tekið fram hvað í henni felst. Er viðkomandi bifreiðastjóra skylt að bera slíka undanþágu á sér er hann er við akstur og sýna trúnaðarmönnum stéttarfélagsins ef þeir æskja þess.

Bílstjórafélagið skal halda skrá yfir veittar undanþágur samkvæmt framansögðu.

15. gr.

Atvinnuleyfin gilda þar til leyfishafar verða 75 ára og skulu þeir leggja leyfi sín inn fyrir 1. júlí næsta ár. Gildistaka hvað varðar aldursmörk frestast um 3 ár frá útgáfu reglugerðar þessarar.

16. gr.

Á hverri bifreiðastöð skal vera skrá yfir þær bifreiðar sem þar hafa afgreiðslu. Skál skrá þessi fest upp þar sem bifreiðastjórar eiga greiðan aðgang að og tilgreint í henni skrásetningarnúmer bifreiðar, nafn og heimilisfang bifreiðastjóra og eiganda.

17. gr.

Úthlutunarmönnum er heimilt að afturkalla atvinnuleyfi um stundarsakir ef leyfishafi brýtur ákvæði reglugerðar þessarar eða fyrir fullt og allt ef um alvarleg eða ítrekuð brot er að ræða. Slíkum úrskurðum má áfrýja til samgönguráðuneytisins.

18. gr.

Reglugerð þessi sem sett er samkvæmt lögum um leigubifreiðar nr. 36, 9. maí 1970, staðfestist hér með til að öðlast þegar gildi og birtist til eftirbreytni öllum þeim sem hlut eiga að máli. Jafnframt fellur úr gildi reglugerð nr. 160, 29. nóvember 1956, og reglugerðir nr. 233, 31. maí 1976 og nr. 285, 12. júní 1984, um breytingar á henni.

Samgönguráðuneytið, 31. maí 1988.

Matthías Á. Mathiesen.

Halldór S. Kristjánsson.

SAMÞYKKT

**um breytingu á samþykkt um stjórn og fundarsköp
Vatnsleysustrandarhrepps nr. 139/1988.**

1. gr.

2. máls. 1. mgr. 8. gr. falli niður, en hann er svohljóðandi:

„Milli umræðna í hreppsnefnd skal halda almennan borgarafund þar sem fjárhagsáætlun er kynnt og rædd.“